

Headlines

1. प्रधानमंत्री नरेंद्र मोदी होरें ओडिशा च सीनियर पोलीस अधिकारिणं दे अखिल भारतीय सम्मेलन च हिस्सा लैता।
2. जम्मू-कश्मीर प्रशासन नै 2 सरकारी कर्मचारिणं गी आतंकवादिणं कन्नै संपर्क होने करी नौकरी थमां बर्खास्त करी दित्ता ऐ।
3. जम्मू च नेशनल सिक्योरिटी गार्ड्स दी तैनाती गी अडिशनल डरैक्टर जनरल पोलीस होरें सुरक्षाबलें गी मजबूत करने आहली कार्रवाई दस्सेआ ऐ।
4. उप-राष्ट्रपति जगदीप धनखड़ होरें आखेआ ऐ जे विकसित भारत हून लम्मी सोच आहला विषय नेई ऐ, पर चुनौतिपूर्ण लक्ष्य जरूर ऐ।

<><><><><><>

PM Conference

प्रधानमंत्री नरेन्द्र मोदी होरें अज्ज ओडिशा दे भुवनेश्वर च पुलस महानिदेशकें ते पुलस महानिरीक्षकें दे अखिल भारती सम्मेलन च हिस्सा लैता। गृह मंत्री अमित शाह, प्रधानमंत्री हुंदे प्रधान सचिव पी.के. मिश्रा, राष्ट्री सुरक्षा सलाहकार अजीत डोभाल, केन्द्री गृह सचिव, सब्बनें राज्यें ते केन्द्र शासत प्रदेशें दे पुलस महानिदेशक ते सुरक्षा एजेंसियें दे प्रमुख इस सम्मेलन च हिस्सा लै करदे ना। अंदरूनी सुरक्षा, नमें अपराधिक कनूनें, समुंदरी सुरक्षा, साइबर अपराध, माओवाद दी समस्या ते आर्टिफिशियल इंटेलीजेंस सने ड्रोन जेई उभरदी तकनीकें करी पैदा चुनौतियें दे बारै च बी इस सम्मेलन दुरान चर्चा कीती जा करदी ऐ। सम्मेलन च आतंकवाद रोधी रणनीति पर बी चर्चा होआ'रदी ऐ। प्रधानमंत्री होर व्र'ऊं दिनें दे इस सम्मेलन च हिस्सा लैने आस्तै कल संज्ञां भुवनेश्वर पुज्जे हे। गृहमंत्री अमित शाह होरें लोक सेवा भवन दे सम्मेलन कक्ष च कल एहदा उद्घाटन कीता हा। प्रधानमंत्री होर कल बी सम्मेलन च हिस्सा लैङन। एहू सम्मेलन राष्ट्री सुरक्षा कन्नै जुडे दे बक्ख-बक्ख मुद्दे पर चर्चा करने लेई पुलसा दे वरिष्ठ अधिकारियें ते सुरक्षा कन्नै जुडे दे प्रशासकें गी इक सांज्ञा मंच प्रदान करदा ऐ। अंदरूनी सुरक्षा दे खतरें दे अलावा अपराधें पर काबू पाने ते कनून बवस्था दे प्रबंधन कन्नै जुडी दिणं चुनौतियें पर बी सम्मेलन च चर्चा होग।

<><><><><><>

J&K Termination

जम्मू कश्मीर दे उपराज्यपाल मनोज सिन्हा होरें कल दऊं सरकारी मलाजमें गी उंदे आतंकिणं सरबंधे करी नौकरी थमां बर्खास्त करी दित्ता। उपराज्यपाल होरें संविधान दी धारा 311(2-सी) तैहत एहू फैसला लैंदे होई किशतवाड जिले दे स्कूल शिक्षक जाकिर अब्बास ते कुलगाम जिले दे सेहत विभाग च फार्मसिस्ट अब्दुल रहमान नायक गी नौकरी थमां बर्खास्त करी दित्ता। अधिकारिणं दस्सेआ जे एहू कारवाई इक जांच मगरा कीती गेई जेहदे च एहू तस्दीक कीती गेदी ही जे इ'नें दौनें मलाजमें दे आतंकवादी गुटें कन्नै सरबंध न। अब्दुल रहमान नाईक दे आतंकी संगठन हिजबुल मुजाहिदीन कन्नै सरबंधें दी पुष्टि होई ऐ ते 2021 च गुलाम हुसैन लोन दी हत्तेआ दे मामले च बी ओहदी शमूलियत ही। तोआई अलीगढ़ मुस्लिम यूनिवर्सिटी थमां डिग्री हासल करने आले जाकिर अब्बास गी 2020 च हिजबुल मुजाहिदीन दे आतंकिणं गी पनाहू देने ते उंदी मदद करने दे आरोप च गिरफ्तार कीता गेआ हा। खुफिया एजेंसिणं मूजब जेले च बंद रौहदे होई बी अब्बास कट्टरपंथी गतिविधिणं च मुल्लवस रेआ।

<><><><><><>

ADGP NSG

जम्मू-कश्मीर पुलस दे जम्मू जोन दे अडिशनल डरैक्टर जनरल आनंद जैन होरें आखेआ ऐ जे जम्मू च सुरक्षाबलें दे सैह्योग लेई राष्ट्री सुरक्षा गार्ड एनएसजी दी तैनाती कीती गेई ऐ। मीडियाकर्मिणं कन्नै गल्ल करदे होई जैन होरें गलाया जे आतंकवादी ढांचे ते एहदे नेटवर्क दा समूलचा नास करने दे मकसद कन्नै जम्मू खित्ते च बड्डे स्तरै पर तपाशी अभियान चलाए जा करदे ना। उनें गलाया जे पिच्छले चार-पंज दिनें दुरान पुलस नै जम्मू खित्ते च आतंकवादिणं लेई कम्म करने आहले ओवर ग्राउंड वर्कमें ते

आतंकवादिएं दे होरनें मददगारें दी धरफगड़ लेई बड्डे स्तर पर छापे मारे न ते केई जनें गी पुच्छगिच्छ लेई हिरासत च बी लैता ऐ। खित्ते च हाल दे समे दुरान आतंकवादी हमले च होए दे बाद्धे गी दिक्खदे होई गृहमंत्रालय दे निर्देश पर एनएसजी दे इक विशेष युनिट गी जम्मू च तैनात कीता गेआ ऐ।

<><><><><><>

AIIMS-Jammu

एम्स जम्मू अस्पताल दे फारेसिक मेडिसन विभाग आसेआ अज्ज इक कार्यशाला लाई गई जेदा विषय हा- अपराध मगरा घटनास्थल दी स्थिति समझना ते गोली कन्ने मौत सरबन्धी मामले दी जांच पड़ताल। अपनी किस्मा दी इस पैहली कार्यशाला दा मकसद जम्मू-कश्मीर पोलीस दे अधिकारिएं गी अपराध स्थल दी जांच ते सबूत जुटाने सरबन्धी आधुनिक तकनीके दी जानकारी देना ऐ। एम्स अस्पताल जम्मू दे एग्जीक्यूटिव डरेक्टर ते सीईओ डॉक्टर शक्ति कुमार गुप्ता होरें एहदा उद्घाटन कीता। कार्यशाला च जम्मू डिविजन दे इक सौ शा बद् डीवाई एसपी, इंस्पेक्टर ते सब इंस्पेक्टरें हिस्सा लैता। एम्स जम्मू दे फारेसिक मेडिकसन विभाग दे एचओडी प्रो. डॉ. निदेश राव होरें पोलीस अधिकारिएं गी अपराध स्थल दी जांच, सबूत जुटाने, अपराधस्थल थमां लोथें गी Bod Bags च पाइए लेने ते दुई कारवाइएं दी सिखलाई दिती। वर्कशाप च गोली लगने कन्ने मौत सरबन्धी मामले दी जांच पड़ताल ते ओदे कन्ने जुडे दे पैहलुएं बारे प्रेक्टिकल सेशन बी लग्गा। इस मौके पर हत्याकांड कन्ने जुडी दी इक सच्ची वारदात पर आधारित अपराधिक मामले गी पेश कीता गेआ ते जांच पड़ताल करने दे तरीकाकार गी समझाया गेआ। एम्स अस्पताल जम्मू दी पहलकदमी, इलाके च इंसाफ दोआने आहली प्रणाली गी मजबूत करने बक्खी इक महत्वपूर्ण योगदान ऐ।

<><><><><><>

Condolences

ऑल इंडिया काउंटर टेरिस्ट फ्रंट जम्मू-कश्मीर नै किश्तवाड़ पोलीस दे सहयोग कन्ने आतंकवादिएं आसेआ मारे गेदे वीडिजीद मेम्बरें कुलदीप कुमार ते नजीर अहमद दे परिवारें कन्ने अफसोस प्रगट कीता गेआ ते उनेंगी माली मदाद भेंट कीती गई। किश्तवाड़ दे कुंतवाड़ा इलाके च आतंकवादिएं वीडिजी मेम्बरें दा अपहरण करने मगरा उंदी हत्तेआ करी दिती ही। किश्तवाड़ दे जिला पोलीस दफ्तर च इक सादे समारोह च सोगी परिवारें गी आदर दे तौरा पर माली सहायता दिती गई। एसएसपी किश्तवाड़ ते दुए सीनियर अधिकारी बी इस मौके पर मौजूद हे।

<><><><><><>

Handloom

साम्बा दे असिस्टेंट डरेक्टर हैंडलूम हुंदे दफ्तर आसेआ साम्बा जिले च इक दिन दी प्रदर्शनी ते जागरूकता कैप दा आयोजन कीता गेआ जेदे च इलाके दी हत्यकरघा ते दस्तकारी विरासत गी दर्शाया गेआ। डरेक्टर हैंडीक्राफ्ट एंड हैंडलूमस जम्मू सूरज प्रकाश टकवाल होरें एहदी अध्यक्षता कीती। डेढ सौ शा मते दस्तकारें ते बुनकरें कैप च हिस्सा लैता। इस पैहलकदमी गी मुकामी शिल्पकारिएं गी सहायता ते मान्यता दोआनें लेई मंच उपलब्ध कराने दे तौर पर समझेया जारदा ऐ।

<><><><><><>

Vice President

उपराष्ट्रपति जगदीप धनखड़ होरें आखेआ ऐ जे विकसित भारत हून सुखना नेई सगुआं चुनौतीपूर्ण लक्ष्य ऐ ते राष्ट्र अपने संकल्प कन्ने इसी पक्क गै हासल करोग। श्री धनखड़ होर अज्ज नमीं दिल्ली च आयोजित सम्मेलन - विकसित भारत 2047@ नमें भारत 3.0 दा विजन गी संबोधित करै करदे हे। उनें आखेआ जे भारती अर्थबवस्था ते बुनियादी ढांचे, डिजिटल बुनियादी ढांचे ते डिजिटल पुज्ज गी अन्तराष्ट्री मुद्रा कोष-आईएमएफ, विश्व बैंक ते विश्व आर्थिक मंच आसेआ सराहेआ जा करदा ऐ। उपराष्ट्रपति होरें गलाया जे आईएमएफ दे मताबक, रासूं-पूंजी ते नमें मौके दे लेहाज कन्ने भारत सब्बनें शा पसंदीदा थाह ऐ। उनें आखेआ जे बवस्था च पारदर्शिता ते जवाबदेही आई ऐ ते 50 करोड़ शा मते लोकें गी घट्ट समे च बैंकिंग प्रणाली कन्ने जोडेआ गेआ ऐ। उनें वोकल फॉर लोकल पर बी जोर दिता। श्री धनखड़ होरें लोकें गी अपनी जरूरत दे स्थाव कन्ने संसाधनें दा इस्तेमाल करने दा बी आग्रह कीता। उनें आखेआ जे लोकें गी इक संरक्षक आहला लेखा कम्म करना लोड़चदा ऐ ते बेवजह संसाधनें दी बर्बादी नेई करनी चाईदी ऐ।

<><><><><><>

DC Poonch (byte)

पुंछ दे डिप्टी कमिशनर विकास कुंडल होरें अज्ज इक उच्ची सतह दी बैठक लाइयै प्रधानमंत्री आदी आदर्श ग्राम योजना तैहत हासल प्रगति दी व्यापक समीक्षा कीती। इस पैहलकदमी दे तैहत जनजातीय ग्राएं गी आदर्श ग्राएं च तब्दील करने बक्खी ध्यान केन्द्रित कीता जा करदा ऐ। बैठक दरान डिप्टी कमिशनर होरें इस योजना तैहत कम्में दी रफतार तेजी करने दी जरूरत पर जोर पाया तांजे इसी बेल्ले सिर सबूरा कीता जाई सकै। उनें ऐल्लै जारी विकास कम्में दी स्थिति दा जायजा बी लैता जिंदा मकसद जनजातीय आबादी आहले इलाकें च ढांचागत विकास, शिक्षा, सेहत ते रोजी-रूट्टी ज्नेई सुविधाएं च बेहतरी आहनना ऐ। इस बारै मती जानकारी दिंदे होई पुंछ दे डिप्टी कमिशनर विकास कुंडल होरें दस्सेआ

<><><><><><>

E-Sehaj

जम्मू-कश्मीर राश्ट्री सेहत मिशन - जेकेएनएचएम नै अज्ज जंदे अक्तूबर म्हीने लेई अस्पताल प्रबंधन सूचना प्रणाली : जेके ई-सहज पर सार्वजनिक सेहत सुविधाएं दी रैंकिंग जारी कीती। सरकारी मेडिकल कॉलेजें कन्नै सरबन्धत अस्पतालें दे नमें जीएमसी दी श्रेणी च पैहली थाह सरकारी मेडिकल कॉलेज कठुआ नै हासल कीती ऐ। जिला अस्पतालें दी श्रेणी च पैहली थाह जिला अस्पताल किशतवाड़ गी हासल होई ऐ। इसै चाल्ली सामुदायिक सेहत केन्द्रें दी श्रेणी च पैहली थाह सीएचसी मढ नै हासल कीती ऐ। जेके ई-सहज नांऽ दी इस पैहलकदमी गी 4 नवम्बर 2022 गी शुरु कीता गेआ हा।

<><><><><><>

Digital Arrest

साईबर पुलसै कल डिजिटल अरैस्ट नांऽ दी धोखाधड़ी च शामिल त्रै जालसाजें गी गिरफ्तार कीता ऐ जिनें इक वरिष्ठ नागरिक थमां 21 लक्ख रपे लुट्टे ना। इक संवाददाता सम्मेलन गी संबोधित करदे होई एसएसपी श्रीनगर इम्तियाज़ हुसैन होरें दस्सेआ जे गिरफ्तार कीते गेदे जालसाजें अपने आपै गी भारती दूरसंचार नियामक प्राधिकरण ते सीबीआई दे अधिकारिणं दे तौर पर पेश कीता। उनें पीडित व्यक्ति पर दबाऽ बनाने आस्तै जाली अरैस्ट वारंट जारी कीते, उसी पैसा मुंतकिल करने लेई आखेआ ते उसी एहू भरोसा बी दित्ता जे ओहदा पैसा किश घेंटें अंदर वापस बी आई जाहगा। इस दबाऽ हेठ आइयै पीडित व्यक्ति नै अपनी एफडी त्रडाई दित्ती ते जालसाजें दे खाते च 21 लक्ख रपे मुंतकिल कीते। इस बारै शकैत थ्होने पर साईबर पुलस कश्मीर तुरत हरकत च आई गेई ते उनें आधुनिक तकनीकें दा इस्तेमाल करदे होई दोषिणं दी शिनाख्त कीती। एहदे परैन्त पुलस दिणं टीमें गी छापेमारी लेई उत्तर प्रदेश, दिल्ली ते पंजाब भेजेआ गेआ ते शामिली, उत्तर प्रदेश दे बसनीक गौरव कुमार, पटियाला पंजाब दे बसनीक गुरप्रीत सिंह ते उज्जवल चौहान गी गिरफ्तार कीता गेआ। पुलसै आम लोकें गी अपील कीती ऐ जे ओहू पैसैं कन्नै सरबन्धत अपनी संवेदनशील जानकारी कुसै कन्नै बी सांझी नेई करन ते इस किस्मै दी धोखाधड़ी होने दी सूरतै च तुरत एहदी जानकारी साईबर पुलस गी देन।

<><><><><><>